




GARIS PANDUAN

SIRI 4

- PROSEDUR PENTADBIRAN PERKAHWINAN, CERAI DAN RUJU' DI DALAM DAN DI LUAR NEGARA
- GARIS PANDUAN UPACARA AKAD NIKAH DI MASJID DAN PERKARA-PERKARA YANG BERKAITAN DENGANNYA
- BER'IDDAH BAGI WANITA YANG BERCERAI ATAU KEMATIAN SUAMI
- BEDAH SIASAT MAYAT MENURUT PERSPEKTIF ISLAM

GARIS PANDUAN (SIRI 4)

Prosedur Pentadbiran Perkahwinan, Penceraian dan Ruju'
Panduan Permohonan & Pendaftaran Perkahwinan, Penceraian dan
Ruju' diluar negara
Panduan Upacara Akad Nikah di Masjid dan Perkara-perkara yang
Berkaitan dengannya
Panduan Ber'iddah bagi Wanita yang Bercerai atau Kematian Suami
Panduan Bedah Siasat Mayat Menurut Perspektif Islam

Cetakan Pertama 2015

Hakcipta terpelihara. Tidak dibenarkan mengeluarkan mana-mana bahagian penerbitan ini dalam apa jua bentuk yang boleh diperolehi semula atau disiarkan dalam sebarang bentuk dengan apa cara, elektronik, mekanikal, fotokopi, rakaman @ sebaliknya tanpa mendapat keizinan daripada penerbit.

Susunan:

Bahagian Fatwa

<http://mufti.penang.gov.my>

Diterbitkan oleh:

JABATAN MUFTI NEGERI PULAU PINANG

Tingkat 48, KOMTAR, 10000 Pulau Pinang

Tel: 04-263 2975 Faks: 04-263 2985

NASKHAH PERCUMA

Senarai Kandungan

GARIS PANDUAN BAGI PROSEDUR PENTADBIRAN PERKAHWINAN, PENCERAIAN DAN RUJU'	5
1. PENGENALAN	5
2. TAFSIRAN	5
3. PROSEDUR PENTADBIRAN PERKAHWINAN	6
GARIS PANDUAN PERMOHONAN & PENDAFTARAN PERKAHWINAN, PENCERAIAN DAN RUJU' DI LUAR NEGARA	15
4. PENDAHULUAN	15
5. PERKAHWINAN DI LUAR NEGARA	15
6. PERMOHONAN BERKAHWIN ATAU BERPOLIGAMI DI LUAR NEGARA	16
7. TANGGUNGJAWAB PENDAFTAR PERKAHWINAN, PENCERAIAN DAN RUJU' DI LUAR NEGARA	17
8. AKAD NIKAH DI LUAR NEGARA	17
9. PENDAFTARAN PERKAHWINAN DI LUAR NEGARA	18
10. PENCERAIAN DI LUAR NEGARA	20
11. RUJU' DI LUAR NEGARA	20
12. PANDUAN RUKUN NIKAH	21
GARIS PANDUAN UPACARA AKAD NIKAH DI MASJID DAN PERKARA-PERKARA YANG BERKAITAN DENGANNYA	26
13. TUJUAN	26
14. LATAR BELAKANG	26
15. TAFSIRAN	28
16. ADAB-ADAB KETIKA BERADA DI DALAM MASJID	29
17. PENUTUP	34
18. RUJUKAN	35

GARIS PANDUAN BER'IDDAH BAGI WANITA YANG BERCERAI ATAU KEMATIAN SUAMI	37
19. TUJUAN	37
20. PENDAHULUAN.....	37
21. TAFSIRAN.....	38
22. HUKUM 'IDDAH DAN BERKABUNG.....	39
23. DALIL-DALIL PENSYARIATAN 'IDDAH.....	40
24. DALIL-DALIL PENSYARIATAN BERKABUNG.....	41
25. HIKMAH 'IDDAH	42
26. JENIS DAN TEMPOH 'IDDAH	43
27. BATASAN HUKUM SEMASA DALAM TEMPOH 'IDDAH TALAK RAJ'IE	46
28. BATASAN HUKUM SEMASA DALAM TEMPOH 'IDDAH TALAK BA'IN	47
29. BATASAN HUKUM SEMASA DALAM TEMPOH 'IDDAH KEMATIAN SUAMI	48
30. KESIMPULAN	50
31. PENUTUP	51
32. RUJUKAN	52
GARIS PANDUAN BEDAH SIASAT MAYAT MENURUT PERSPEKTIF ISLAM	55
33. DAFTAR ISTILAH	55
34. TUJUAN	55
35. PENGENALAN.....	55
36. KEPUTUSAN FATWA.....	56
37. AMALAN BEDAH SIASAT MAYAT	57
38. ETIKA BEDAH SIASAT MAYAT MENURUT ISLAM	62
39. PERANAN JABATAN / AGENSI.....	67
40. PENUTUP	68

**GARIS PANDUAN
BAGI PROSEDUR
PENTADBIRAN
PERKAHWINAN,
PENCERAIAN DAN RUJU'**

GARIS PANDUAN BAGI PROSEDUR PENTADBIRAN PERKAHWINAN, PENCERAIAN DAN RUJU'

1. PENGENALAN

Prosedur Pentadbiran Perkahwinan, Perceraian dan Ruju' ini menggariskan peraturan- peraturan pentadbiran yang perlu diikuti oleh Ketua Pendaftar dan Pendaftar Perkahwinan, Penceraian dan Ruju' dalam melaksanakan Akta/Enakmen/ Ordinan Undang-undang Keluarga Islam Negeri-negeri mengenai perkahwinan, perceraian dan ruju'.

2. TAFSIRAN

Dalam Prosedur Pentadbiran ini, melainkan jika konteksnya menghendaki makna yang berlainan :

'Beristeri' ertinya mempunyai isteri.

'Iddah' ertinya tempoh menanti yang diwajibkan ke atas isteri yang diceraikan oleh suaminya, atau yang mati suaminya.

'Tempoh Bermastautin' ertinya tinggal dalam sesuatu kawasan tertentu sekurang- kurangnya 90 hari atau mengikut budi bicara Pendaftar.

'Teruna' ertinya lelaki yang belum pernah berkahwin mengikut Hukum Syarak. ' Wali Mujbir ' ertinya bapa atau datuk lelaki sebelah bapa.

'Negeri' ertinya negeri-negeri di dalam Malaysia. ' Luar Negeri ' ertinya luar negara.

'Tempat Lain' ertinya di luar kariah masjid atau dalam mana-mana negeri.

3. PROSEDUR PENTADBIRAN PERKAHWINAN

A. KURSUS PRA PERKAHWINAN MODUL BERSEPADU KURSUS PRA PERKAHWINAN ISLAM (MBKPPI)

Pendaftar Perkahwinan , Perceraian dan Ruju' hendaklah memastikan pasangan bagi warganegara Malaysia yang mengemukakan permohonan mereka untuk mendapatkan kebenaran berkahwin telah menghadiri kursus dan memiliki Sijil Kursus Pra Perkahwinan MBKPPI.

B. UJIAN SARINGAN HIV DI KLINIK KESIHATAN KERAJAAN

- (i) Permohonan Kebenaran Berkahwin yang telah mendapat pengesahan dari Penolong Pendaftar hendaklah dihantar semula ke Jabatan Agama Islam ditempat masing-masing bersama dengan keputusan Ujian Saringan HIV yang telah disahkan oleh Pegawai Perubatan Kerajaan.
- (ii) Sekiranya keputusan ujian adalah NEGATIF, proses permohonan kebenaran berkahwin akan diteruskan.
- (iii) Sekiranya keputusan HIV adalah POSITIF, maka:
 - (a) Pemohon perlu menjalani sesi khidmat nasihat di Jabatan Agama sebelum meneruskan permohonan kebenaran berkahwin.
 - (b) Pemohon, pasangan dan keluarga akan diberi pendedahan tentang implikasi HIV.
 - (c) Pemohon dan pasangan akan diminta membuat keputusan sama ada mahu meneruskan perkahwinan atau sebaliknya.
 - (d) Sekiranya pemohon dan pasangan membuat keputusan untuk meneruskan perkahwinan, maka permohonan kebenaran berkahwin akan diproses.

- (e) Pemohon dan pasangan perlu merujuk kepada Pakar Perubatan Keluarga dan Klinik Penyakit Berjangkit untuk penjagaan kesihatan seterusnya.

C. PERMOHONAN UNTUK KEBENARAN BERKAHWIN

1. Pengesahan Permohonan Berkahwin

- a) Penolong Pendaftar hendaklah memastikan pemohon yang membuat permohonan kebenaran berkahwin adalah tinggal atau bermastautin di kawasan kariahnya.
- b) Penolong Pendaftar hendaklah memastikan permohonan untuk berkahwin menggunakan borang yang ditetapkan.
- c) Penolong Pendaftar hendaklah memastikan borang permohonan di isi dengan lengkap oleh pemohon.
- d) Penolong Pendaftar hendaklah memastikan borang permohonan kebenaran berkahwin dilampirkan bersama dokumen-dokumen berkaitan seperti berikut:
 - i. Salinan Sijil Kelahiran.
 - ii. Salinan Kad Pengenalan.
 - iii. Sijil Kursus Pra Perkahwinan MBKPPI
 - iv. Keputusan Saringan HIV kedua-dua bakal pengantin.
 - v. Surat akuan teruna yang dikeluarkan oleh majikannya atau surat akuan sumpah teruna sekiranya beliau tidak mempunyai majikan (jika pemohon seorang lelaki).
 - vi. Surat perakuan cerai (jika pemohon bercerai hidup).
 - vii. Surat perakuan mati (jika pemohon bercerai mati).
 - viii. Surat akuan memeluk agama Islam (jika saudara baru).
 - ix. Surat kebenaran daripada Jabatan polis (jika pemohon anggota polis).
 - x. Surat kebenaran dari angkatan Tentera (jika pemohon anggota tentera).

- e) Setelah berpuashati Penolong Pendaftar hendaklah mengesahkan status pemohon di dalam ruang yang disediakan dalam borang permohonan perkahwinan berkenaan.

2. Kebenaran Permohonan Berkahwin

- a) Pendaftar hendaklah menerima permohonan yang telah disahkan oleh penolong pendaftar kecuali bagi sub peraturan (iii).
- b) Pendaftar hendaklah memastikan borang perkahwinan diterima selewatnya tujuh hari sebelum tarikh perkahwinan yang dicadangkan.
- c) Pendaftar boleh menerima borang permohonan perkahwinan bagi kes-kes tertentu.
- d) Setelah berpuashati Pendaftar hendaklah mengeluarkan kebenaran perkahwin melalui catatan dalam borang permohonan bagi perkahwinan dalam negeri. Manakala bagi permohonan perkahwinan luar negeri dan tempat lain dikeluarkan melalui surat kebenaran.

3. Proses Permohonan Perkahwinan

- a) Yang Memerlukan Kebenaran Mahkamah
 - Pendaftar hendaklah memastikan kes-kes berikut dirujuk kepada Mahkamah apabila:
 - i. Perempuan tidak mempunyai wali nasab atau wali enggan.
 - ii. Pasangan atau salah seorang kepada perkahwinan itu masih dibawah umur.
 - iii. Perkahwinan itu secara poligami.
 - iv. Perempuan yang bercerai dan belum disetubuhi oleh suami. (jika perkahwinan itu dalam tempoh iddah perceraian biasa)

- Pendaftar hendaklah menyemak permohonan tersebut sebelum dikemukakan ke Mahkamah.
- Setelah berpuas hati terhadap borang permohonan berkahwin dan dokumen-dokumen yang dilampirkan, Pendaftar hendaklah mengeluarkan surat dan laporan kepada Pendaftar Mahkamah melalui pemohon.
- Pendaftar hendaklah menguruskan perkahwinan setelah mendapat kebenaran daripada Mahkamah.

4. Tempoh Sah Kebenaran Berkahwin

- (a) Pendaftar hendaklah mengeluarkan kebenaran kahwin bagi tempoh sembilan puluh (90) hari dari tarikh dikeluarkan.
- (b) Pendaftar boleh dengan permohonan melanjutkan tempoh sah kebenaran berkahwin selama sembilan puluh (90) hari lagi bagi kes-kes tertentu.
- (c) Pendaftar hendaklah memastikan bahawa kebenaran berkahwin lanjutan dibuat dalam tempoh empat belas (14) hari dari tarikh tamat kebenaran berkahwin kali pertama.
- (d) Pendaftar hendaklah memastikan permohonan lanjutan kebenaran berkahwin dibuat di pejabat Pendaftar di mana kebenaran asal dikeluarkan.
- (e) Pendaftar hanya boleh menerima permohonan kebenaran berkahwin yang baru setelah tamat tempoh lanjutan kebenaran berkahwin.

5. Kebenaran Berkahwin Dengan Warga Asing

(a) Perkahwinan Warganegara Malaysia Dengan Warganegara Asing di Malaysia.

- i. Bagi perkahwinan warganegara asing dengan warganegara Malaysia, Pendaftar hendaklah memastikan borang permohonan berkahwin disertakan dengan dokumen-dokumen berikut:

- Salinan pasport yang sah.
- Surat kebenaran dari kedutaan negara pemohon.
- Surat keterangan dari Jabatan Imigresen Malaysia.
- ii. Sekiranya warganegara asing adalah seorang wanita, Pendaftar hendaklah memastikan kehadiran walinya atau mendapat surat pengesahan wakalah wali dari pihak berkuasa agama negara pemohon.

(b) Perkahwinan Warganegara Malaysia Dengan Warganegara Asing di Luar Negeri.

Pendaftar hendaklah mengeluarkan surat kebenaran berkahwin bagi mana-mana permohonan perkahwinan yang akan dilangsungkan di luar negeri sama ada dengan warganegara asing atau sesama warganegara Malaysia

6. Bayaran Surat Kebenaran Berkahwin

- (a) Pendaftar hanya boleh mengeluarkan surat kebenaran berkahwin setelah pemohon menjelaskan bayaran yang telah ditetapkan.
- (b) Pendaftar hendaklah mengeluarkan surat rasmi bagi tiap-tiap bayaran yang diterima kepada pemohon.

7. Akad Nikah

- (a) Pendaftar hendaklah memastikan akad nikah dilangsungkan dalam kariah di mana perempuan itu tinggal atau bermastautin.
- (b) Pendaftar boleh memberi kebenaran akad nikah dilangsungkan di tempat lain.
- (c) Pendaftar hendaklah memastikan majlis akad nikah dilangsungkan oleh:
 - i. Wali di hadapan Pendaftar.
 - ii. Wakil wali di hadapan dan dengan kebenaran Pendaftar.
 - iii. Pendaftar sendiri sebagai wakil wali.

- iv. Pendaftar sebagai Wali Raja (Hakim) bagi perempuan yang tidak ada wali nasab atau wali enggan.

D. PROSEDUR PENDAFTARAN PERKAHWINAN

1. Pendaftaran Perkahwinan Dalam Negeri

- (a) Selepas upacara nikah Pendaftar hendaklah mendaftarkan perkahwinan tersebut dengan segera sebagaimana yang ditetapkan oleh undang- undang yang sedia ada.
- (b) Pendaftar hendaklah mengeluarkan Surat Akuan Nikah dalam tempoh tiga puluh (30) hari dari tarikh pendaftaran perkahwinan.

2. Pendaftaran Perkahwinan Luar Negeri

- (a) Pendaftar hendaklah memastikan bahawa permohonan pendaftaran bagi perkahwinan yang dilangsungkan di luar negeri hanya bagi perkahwinan yang tidak dibuat di Kedutaan atau oleh Pendaftar yang dilantik.
- (b) Pendaftar hendaklah memastikan bahawa perkahwinan di luar negeri yang belum didaftarkan sahaja yang boleh didaftarkan.
- (c) Pendaftar hendaklah memastikan setiap permohonan pendaftaran nikah mempunyai butir dan maklumat berikut:
 - Surat perakuan nikah luar negeri.
 - Atau apa-apa keterangan sama ada secara lisan atau tulisan yang boleh memuaskan hati Pendaftar sebelum perkahwinan berlaku.
 - Permohonan dibuat menggunakan borang yang ditetapkan yang ditandatangani oleh Pemohon sendiri.
- (d) Pendaftar boleh mengecualikan pasangan suami/isteri untuk hadir di hadapannya dengan syarat ia berpuas hati mengenai maklumat berhubung dengan perkahwinan itu.

- (e) Pendaftar hendaklah mencatatkan sebab-sebab pasangan suami isteri tidak hadir dalam daftar perkahwinan.
- (f) Selepas mendaftar Pendaftar hendaklah dengan segera menyerahkan atau menghantar satu salinan pendaftaran nikah yang telah ditandatangani kepada pasangan suami isteri.
- (g) Pendaftar juga dikehendaki menyerahkan satu salinan pendaftaran nikah kepada Ketua Pendaftar dalam tempoh yang ditetapkan supaya salinan tersebut dijilidkan dalam perkahwinan orang Islam di luar negeri.

E. PROSEDUR PENDAFTARAN PERCERAIAN

- 1. Pendaftar hendaklah menerima salinan keputusan pengesahan perceraian yang dikeluarkan oleh Mahkamah
- 2. Pendaftar hendaklah menyemak salinan keputusan pengesahan perceraian tersebut. Jika terdapat kesilapan, borang hendaklah dikembalikan kepada pemohon untuk pembetulan di Mahkamah.
- 3. Setelah berpuashati Ketua Pendaftar hendaklah menandatangani Surat Perakuan Cerai.
- 4. Pendaftar hanya boleh mengeluarkan Surat Perakuan Cerai setelah pemohon membuat pembayaran pendaftaran cerai
- 5. Pendaftar hendaklah mengeluarkan Surat Perakuan Cerai dalam tempoh tiga puluh (30) hari dari tarikh pendaftaran perceraian.

F. PROSEDUR PENDAFTARAN RUJU'

- 1. Pendaftar sebelum menerima laporan atau cadangan suami isteri mengenai persetujuan ruju' hendaklah memastikan bahawa permohonan pengesahan cerai telah dihantar di Mahkamah.

2. Sekiranya ruju' dilafazkan bukan di hadapan pendaftar, maka pendaftar hendaklah memastikan dan berpuashati ia dilakukan mengikut hukum syarak.
3. Pendaftar hendaklah memastikan pemohon mengisi borang permohonan ruju' dengan lengkap.
4. Pendaftar boleh mendengar lafaz untuk dilafazkan di hadapannya walaupun perceraian belum diputuskan oleh Mahkamah.
5. Pendaftar hendaklah mengemukakan surat pengesahan ruju' sementara kepada pemohon.
6. Pendaftar hanya boleh mendaftar ruju' setelah pemohon mengemukakan :
 - i. Surat pengesahan cerai dari Mahkamah.
 - ii. Bayaran pendaftar ruju'.
 - iii. Sijil Perakuan cerai.
7. Pendaftar hendaklah mengeluarkan surat akuan ruju' dalam tempoh tiga puluh hari (30) hari dari tempoh permohonan ruju' serta selesai didaftarkan.

**GARIS PANDUAN
PERMOHONAN &
PENDAFTARAN
PERKAHWINAN,
PERCERAIAN
DAN RUJU'
DI LUAR NEGARA**

GARIS PANDUAN PERMOHONAN & PENDAFTARAN PERKAHWINAN, PERCERAIAN DAN RUJU' DI LUAR NEGARA

4. PENDAHULUAN

- A. Pada umumnya, perkahwinan, perceraian dan ruju' di luar negara hendaklah berdasarkan Hukum Syarak dan Akta/Enakmen Undang-Undang Keluarga Islam negeri-negeri atau undang-undang yang berkuat kuasa di negara berkenaan.
- B. Bagi memudahkan urusan perkahwinan, perceraian dan ruju' di luar negara, Kerajaan Malaysia telah melantik Pendaftar Perkahwinan, Perceraian dan Ruju' di Kedutaan, Suruhanjaya Tinggi atau Pejabat Konsul di beberapa buah negara. Bagi Kedutaan, Suruhanjaya Tinggi atau Pejabat Konsul di luar negara yang tidak mempunyai Pendaftar Perkahwinan, Perceraian dan Ruju', rakyat Malaysia dibenarkan mendaftarkan perkahwinan, perceraian dan ruju' di Badan-Badan Agama, Majlis Agama Islam atau Pusat Islam yang diiktiraf oleh pihak berkuasa negara berkenaan.

5. PERKAHWINAN DI LUAR NEGARA

- A. Berdasarkan peruntukan Undang-Undang Keluarga Islam di Malaysia perkahwinan di luar negara boleh dibuat di :
 - i. Kedutaan, Suruhanjaya Tinggi atau Pejabat Konsul Malaysia yang mempunyai Pendaftar Perkahwinan, Perceraian dan Ruju' yang dilantik oleh Kerajaan Malaysia.
 - ii. Badan-badan Agama, Majlis Agama Islam atau Pusat Islam yang diiktiraf oleh pihak berkuasa negara berkenaan.

6. PERMOHONAN BERKAHWIN ATAU BERPOLIGAMI DI LUAR NEGARA

A. Tanggungjawab Pemohon yang ingin berkahwin atau berpoligami.

Permohonan berkahwin bagi orang Islam yang tinggal di luar negara boleh dikemukakan kepada :

- i. Pendaftar Perkahwinan, Perceraian dan Ruju' di luar negara yang dilantik oleh Kerajaan Malaysia yang ditempatkan di Kedutaan, Suruhanjaya Tinggi atau Pejabat Konsul.
- ii. Badan-badan Agama, Majlis Agama Islam atau Pusat Islam yang diiktiraf oleh pihak berkuasa negara berkenaan.

B. Permohonan berkahwin atau berpoligami bagi orang Islam yang tinggal di Malaysia dan ingin berkahwin di luar negara hendaklah dikemukakan kepada Jabatan Agama Islam Negeri atau Mahkamah Syariah yang mana berkenaan.

C. Bagi perkahwinan atau poligami yang dijalankan di Badan-Badan Agama, Majlis Agama Islam atau Pusat Islam, pasangan hendaklah memastikan perkahwinan atau poligami tersebut dijalankan berdasarkan peraturan dan undang-undang yang berkuat kuasa di negara berkenaan dan bertepatan dengan Hukum Syarak manakala pemohon perempuan telah mendapat keizinan daripada Wali dengan menyertakan Surat Wakalah Wali (jika berkaitan).

7. TANGGUNGJAWAB PENDAFTAR PERKAHWINAN, PENCERAIAN DAN RUJU' DI LUAR NEGARA

- A. Pendaftar Perkahwinan, Perceraian dan Rujuk di luar negara hendaklah memastikan perkara-perkara berikut :
- i. Memastikan pemohon perempuan telah mendapat keizinan daripada Wali dengan menyertakan Surat Wakalah Wali (jika berkenaan).
 - ii. Memastikan perkahwinan, perceraian dan rujuk dijalankan mengikut hukum Syarak dan Akta/Enakmen Undang-Undang Keluarga Islam yang berkuat kuasa di Malaysia atau undang-undang yang berkuat kuasa di negara berkenaan.
 - iii. Mendapat kebenaran berkahwin daripada Jabatan Agama Islam Negeri atau Mahkamah Syariah yang berkenaan (jika berkenaan).
 - iv. Mendapat kebenaran berpoligami daripada Mahkamah Syariah, (jika berkenaan).
 - v. Merekodkan maklumat perkahwinan yang dibuat bagi memudahkan urusan- urusan pengesahan nikah, mendaftar kelahiran anak, persekolahan anak-anak, kematian, perceraian, sebarang tuntutan melibatkan urusan Mahkamah, keperluan Imigresen dan sebagainya.
 - vi. Memastikan maklumat perkahwinan diisi dengan lengkap dan kemas oleh pemohon.

8. AKAD NIKAH DI LUAR NEGARA

- A. Akad nikah di Kedutaan, Suruhanjaya Tinggi atau Pejabat Konsul boleh dilakukan oleh :
- i. Wali perempuan di hadapan Pendaftar Perkahwinan, Perceraian dan Rujuk yang dilantik di luar negara (jika ada) ; atau

- ii. Wakil Wali di hadapan dan dengan kebenaran Pendaftar Perkahwinan,
 - iii. Perceraian dan Rujuk yang dilantik di luar negara (jika ada) ; atau
 - iv. Pendaftar Perkahwinan, Perceraian dan Rujuk yang dilantik di luar negara (jika ada).
 - v. Jika perkahwinan tersebut melibatkan seorang perempuan yang tidak mempunyai wali nasab, perkahwinan tersebut hendaklah diakadnikahkan oleh Wali Raja/Wali Hakim.
- B. Pendaftar digalakkan memberi taklimat atau penerangan ringkas tentang hal-hal berkaitan dengan perkahwinan dalam Islam.
- C. Akad nikah di Badan-Badan Agama, Majlis Agama Islam atau Pusat Islam hendaklah mengikut Hukum Syarak dan undang-undang yang berkuat kuasa di negara berkenaan.

9. PENDAFTARAN PERKAHWINAN DI LUAR NEGARA

A. PENDAFTARAN PERKAHWINAN.

- i. Pendaftar Perkahwinan, Perceraian dan Rujukan hendaklah mendaftarkan semua perkahwinan yang dilangsungkan di luar negara apabila permohonan pendaftaran dikemukakan oleh pemohon.

B. PENDAFTARAN PERKAHWINAN DI BADAN-BADAN AGAMA, MAJLIS AGAMA ISLAM ATAU PUSAT ISLAM YANG DIKTIKRAF DI LUAR NEGARA.

- i. Bagi pasangan yang berkahwin di Badan-Badan Agama, Majlis Agama Islam atau Pusat Islam yang diiktiraf di luar negara dan tidak mendaftarkan perkahwinan tersebut di Kedutaan, Suruhanjaya Tinggi atau Pejabat Konsul, hendaklah

mendapatkan surat nikah, sijil nikah atau apa-apa kenyataan yang membawa maksud pernikahan yang dikeluarkan oleh Badan-badan Agama, Majlis Agama Islam atau Pusat Islam di luar negara bagi tujuan pendaftaran perkahwinan di Malaysia.

- ii. Setelah kembali ke Malaysia, pasangan tersebut hendaklah membuat permohonan pendaftaran bagi perkahwinan yang dilangsungkan di luar negara di Jabatan Agama Islam Negeri yang berkaitan dalam tempoh masa enam (6) bulan setelah kembali ke Malaysia.

(a) Setiap permohonan pendaftaran nikah hendaklah disertakan dengan maklumat seperti yang berikut:

1. Salinan kad pengenalan suami dan isteri yang disahkan (jika berkenaan);
2. Salinan pasport suami atau isteri yang bukan warganegara yang disahkan atau suratakuan sumpah yang diikrarkan di hadapan Pesuruhjaya Sumpah (jika berkenaan);
3. Salinan Perakuan Masuk Islam atau apa-apa catatan mengenai pengislaman yang disahkan (jika berkenaan);
4. Salinan surat kebenaran berkahwin yang disahkan (jika berkenaan);
5. Salinan sijil mati yang disahkan jika pemohon bercerai mati atau perintah anggapan mati beserta dengan surat perakuan nikah yang asal;
6. Surat nikah asal dan salinannya yang disahkan serta terjemahan surat nikah asal dalam bahasa kebangsaan atau bahasa Inggeris;

7. Surat perakuan cerai dan pembatalan salinannya yang disahkan atau apa-apa pengesahan perceraian yang diiktiraf oleh Mahkamah (jika berkenaan);
8. Surat wakalah wali sekiranya wali tidak dapat hadir semasa majlis akad nikah dijalankan; dan
9. Apa-apa dokumen berkaitan pernikahan yang diperakui oleh pihak berkuasa agama negara berkenaan.

10. PERCERAIAN DI LUAR NEGARA

- A. Apabila berlaku perceraian di luar negara pasangan bolehlah membuat pengesahan lafaz cerai di Mahkamah Syariah, (sekiranya ada), Badan-badan Agama, Majlis Agama Islam atau Pusat Islam yang diiktiraf oleh pihak berkuasa agama negara berkenaan.
- B. Pasangan hendaklah mendapatkan surat cerai atau apa-apa dokumen dan pernyataan berkaitan perceraian yang diperakui oleh Badan-badan Agama, Majlis Agama Islam atau Pusat Islam negara berkenaan sekiranya pengesahan penceraian dibuat di tempat-tempat berkenaan.
- C. Setelah kembali ke Malaysia, pasangan hendaklah mengemukakan permohonan pendaftaran penceraian kepada Pendaftar Perkahwinan, Penceraian dan Ruju' di Jabatan Agama Islam Negeri yang berkenaan dan Pendaftar hendaklah mendaftarkan dan merekod maklumat penceraian setelah berpuas hati berhubung penceraian tersebut.

11. RUJU' DI LUAR NEGARA

- A. Apabila berlaku ruju' di luar negara, pasangan hendaklah mendaftarkan ruju' itu di hadapan Pendaftar Perkahwinan, Perceraian dan Ruju' di Luar Negara (sekiranya ada) di Kedutaan, Suruhanjaya Tinggi atau Pejabat Konsul.

- B. Jika ruju' tersebut dibuat di Badan-Badan Agama, Majlis Agama Islam atau Pusat Islam yang diiktiraf oleh pihak berkuasa Negara berkenaan, pasangan hendaklah mendapatkan surat ruju' atau apa-apa dokumen dan pernyataan berkaitan ruju' yang diperakui oleh Badan-badan Agama, Majlis Agama Islam atau Pusat Islam negara berkenaan.
- C. Setelah kembali ke Malaysia, pasangan hendaklah mengemukakan permohonan pendaftaran ruju' kepada Pendaftar Perkahwinan, Perceraian dan Ruju' di Jabatan Agama Islam Negeri yang berkenaan dan Pendaftar hendaklah mendaftarkan dan merekodkan maklumat ruju' setelah berpuas hati berhubung ruju' tersebut.

12. PANDUAN RUKUN NIKAH

A. RUKUN NIKAH

- i. Lelaki - calon suami
- ii. Perempuan - calon isteri
- iii. Wali
- iv. Dua orang saksi (lelaki)
- v. Sighah (ijab dan qabul)

B. SYARAT-SYARAT NIKAH

(a) SYARAT BAGI LELAKI (Calon Suami)

- i. Islam
- ii. Bukan mahram dengan bakal isterinya.
- iii. Bukan dalam ihram.
- iv. Tertentu orangnya
- v. Berkemampuan zahir dan batin
- vi. Tidak beristeri empat
- vii. Tidak dipaksa

(b) SYARAT BAGI PEREMPUAN (Calon Isteri)

- i. Islam
- ii. Bukan mahram dengan bakal suaminya
- iii. Bukan dalam ihram
- iv. Tertentu orangnya
- v. Bukan isteri orang
- vi. Bukan dalam iddah

C. SYARAT WALI¹

- i. Islam
- ii. Lelaki
- iii. Baligh
- iv. Berakal
- v. Merdeka
- vi. Adil (tidak fasiq)
- vii. Tidak dipaksa
- viii. Bukan dalam ihram
- ix. Bukan dungu/safih

D. SYARAT DUA ORANG SAKSI (Lelaki)

- i. Islam
- ii. Lelaki
- iii. Baligh
- iv. Berakal
- v. Merdeka
- vi. Adil (tidak fasiq)
- vii. Mendengar
- viii. Melihat
- ix. Tidak bisu
- x. Memahami maksud ijab dan qabul

¹ Wali ialah orang yang memiliki atau diberi kuasa Syara' untuk mengakad nikah.

- xi. Ingatan yang baik.

E. SYARAT IJAB DAN QABUL

- i. Berturutan di antara lafaz ijab dan qabul.
- ii. Jelas sebutan ijab dan qabul.
- iii. Didengar oleh dua orang saksi yang memahami maksud ijab dan qabul.
- iv. Disebut nama perempuan dengan khusus (ijab).
- v. Tidak berta'liq/bersyarat (tempoh yang tertentu).
- vi. Tidak diselangi masa panjang antara ijab dan qabul mengikut uruf.
- vii. Menggunakan perkataan “nikah” semasa ijab dan qabul atau yang membawa makna yang sama.

F. SUSUNAN WALI

- 1. Bapa kandung
- 2. Datuk (Bapa kepada bapa kandung ke atas)
- 3. Saudara lelaki seibu sebapa
- 4. Saudara lelaki sebapa
- 5. Anak saudara lelaki seibu sebapa ke bawah
- 6. Anak saudara lelaki sebapa ke bawah
- 7. Bapa saudara sebelah bapa seibu sebapa
- 8. Bapa saudara sebelah bapa sebapa
- 9. Anak lelaki bapa saudara sebelah bapa seibu sebapa ke bawah
- 10. Anak lelaki bapa saudara sebelah bapa sebapa ke bawah
- 11. Bapa saudara bapa seibu sebapa
- 12. Bapa saudara bapa sebapa
- 13. Anak lelaki bapa saudara bapa seibu sebapa
- 14. Anak lelaki bapa saudara bapa sebapa ke bawah
- 15. Bapa saudara datuk lelaki seibu sebapa
- 16. Bapa saudara datuk lelaki sebapa

17. Anak lelaki bapa saudara datuk lelaki seibu sebapa ke bawah
18. Anak lelaki bapa saudara datuk lelaki sebapa ke bawah
19. Wali Hakim/Wali Raja/Wali Sultan.

**GARIS PANDUAN
UPACARA AKAD NIKAH
DI MASJID DAN
PERKARA-PERKARA
YANG BERKAITAN
DENGANNYA**

GARIS PANDUAN UPACARA AKAD NIKAH DI MASJID DAN PERKARA-PERKARA YANG BERKAITAN DENGANNYA

13. TUJUAN

Garis Panduan Upacara Akad Nikah Di Masjid dan Perkara- Perkara yang Berkaitan Dengannya disediakan untuk memberi panduan dan rujukan kepada masyarakat Islam di Malaysia mengenai adab semasa melakukan upacara akad nikah di masjid atau surau agar selaras dengan tuntutan Islam.

14. LATAR BELAKANG

- i. Perkahwinan merupakan ikatan suci yang menghalalkan perhubungan antara lelaki dan perempuan. Ia suatu yang amat dituntut dalam Islam kerana menerusinya keperluan fitrah manusia dapat disalurkan secara halal selain bertujuan meneruskan zuriat dan keturunan bagi mendapat keredaan Allah SWT.
- ii. Terdapat lima rukun nikah, iaitu pengantin lelaki (suami), pengantin perempuan (isteri), wali, saksi dan lafaz (ijab dan qabul). Justeru, upacara akad nikah merupakan upacara yang paling penting dalam majlis perkahwinan kerana menerusinya, ikatan antara seorang lelaki dan seorang perempuan menjadi sah sebagai pasangan suami isteri dan perhubungan antara mereka menjadi halal.
- iii. Secara umumnya, majlis akad nikah boleh dilaksanakan sama ada di rumah, surau, masjid atau tempat-tempat lain yang bersesuaian. Untuk majlis akad nikah di masjid, Islam sememangnya membenarkan amalan ini kerana Nabi SAW pernah menikahkan seorang perempuan di dalam masjid sebagaimana sabda Baginda SAW:

أَعْلِنُوا هَذَا النِّكَاحَ وَاجْعَلُوهُ فِي الْمَسَاجِدِ وَاضْرِبُوا عَلَيْهِ بِالذُّفُوفِ

Maksudnya:

“Hebahkanlah akan pernikahan ini dan lakukanlah ia di masjid, dan palulah (raikannya) dengan memukul gendang (di luar masjid).”

Hadith riwayat al-Tirmidhi

- i. Tambahan pula, fungsi dan kemudahan yang disediakan di institusi masjid pada hari ini tidak hanya tertumpu sebagai tempat pelaksanaan ibadah khusus semata-mata, bahkan masjid berperanan sebagai pusat perhubungan antara komuniti Islam dalam menjayakan pelbagai program dan aktiviti merangkumi bidang keilmuan, perekonomian, kebudayaan, pendidikan dan sebagainya.
- ii. Dalam hal ini juga, fungsi masjid telah diperluaskan lagi sebagai tempat untuk melangsungkan upacara akad nikah dan kenduri perkahwinan bertujuan untuk memudahkan urusan pernikahan dan mendapat keberkatan daripada Allah SWT. Namun begitu, majlis akad nikah yang dilangsungkan di masjid itu mestilah selari dengan kehendak syarak dan tidak bercampur- aduk dengan perkara-perkara yang bercanggah dengan tuntutan Islam. Ini kerana hukum asal keharusan tersebut boleh bertukar menjadi haram sekiranya di dalam majlis tersebut terdapat percampuran antara perkara yang harus dan perkara yang haram.
- iii. Justeru, amat wajar masjid sebagai tempat yang suci lagi mulia, dihormati oleh setiap pengunjungnya dengan mematuhi segala peraturan dan adab-adab yang telah digariskan oleh Islam.

- iv. Muzakarah Jawatankuasa Fatwa Majlis Kebangsaan Bagi Hal Ehwal Agama Islam Malaysia Kali Ke-95 yang bersidang pada 16 hingga 18 Jun 2011 telah membincangkan Hukum Upacara Akad Nikah di Masjid dan keputusannya seperti yang berikut:

“Muzakarah berpandangan bahawa Jumhur ulama’ telah memperakukan bahawa upacara akad nikah dibenarkan untuk dilaksanakan di masjid. Bahkan ulama’ mazhab Shafie berpendapat adalah sunat dan digalakkan untuk melaksanakan akad nikah di masjid. Sehubungan itu, Muzakarah bersetuju memutuskan bahawa melakukan upacara akad nikah di masjid atau surau adalah disunatkan untuk mendapat keberkatan. Walau bagaimanapun, kedua-dua pihak bagi pengantin lelaki dan perempuan yang turut menyertai upacara akad nikah tersebut hendaklah menjaga adab dan mematuhi peraturan semasa berada di dalam masjid atau surau berkenaan.”

15. TAFSIRAN

Tafsiran bagi beberapa istilah yang berkaitan dengan garis panduan ini adalah seperti yang berikut:

- a) **“Fadilat”** bermaksud kelebihan, darjat yang tinggi.
- b) **“Iktikaf”** bermaksud tinggal di masjid dengan tujuan mendekatkan diri kepada Allah SWT.
- c) **“Khusyuk”** bermaksud tunduk, taat, merendah diri.
- d) **“Masjid”** bermaksud bangunan khas tempat umat Islam melakukan solat Jumaat dan ibadah-ibadah lain.
- e) **“Nikah”** bermaksud akad yang menghalalkan perhubungan antara suami isteri.

16. ADAB-ADAB KETIKA BERADA DI DALAM MASJID

Adab-adab semasa hadir ke majlis akad nikah yang dilangsungkan di masjid perlu sentiasa diambil perhatian oleh pasangan pengantin dan ahli rombongan yang hadir. Ia merangkumi beberapa aspek seperti yang berikut:

- a) Melakukan ibadat-ibadat sunat;
- b) Memelihara adab berpakaian;
- c) Memelihara adab berhias dan berdandan; dan
- d) Menjaga tatatertib dan kesantunan.

Melakukan Ibadat-Ibadat Sunat

Memandangkan masjid merupakan rumah Allah SWT, sewajarnya setiap umat Islam yang mengunjungi masjid berusaha untuk mendapat ganjaran pahala dan fadilat semasa berada di dalamnya. Justeru, bakal pengantin berserta ahli rombongan yang hadir, disunatkan untuk melakukan perkara-perkara berikut apabila memasuki masjid:

- a) Berwuduk;
- b) Berniat iktikaf dengan lafaz "sahaja aku mengerjakan sunat iktikaf di masjid ini kerana Allah Taala";
- c) Sebelum duduk, disunatkan menunaikan sembahyang sunat tahiyyatul masjid sebanyak dua rakaat dengan lafaz niat "sahaja aku sembahyang sunat tahiyyatul masjid, dua rakaat kerana Allah Taala"; dan
- d) Berzikir secara senyap tanpa mengganggu orang lain, sementara menunggu upacara akad nikah bermula.

Adab Berpakaian

Setiap pengunjung yang berkunjung ke masjid mestilah menjaga adab berpakaian semasa berada di dalamnya.

Bagi lelaki, adab berpakaian semasa menghadiri upacara akad nikah di masjid adalah seperti yang berikut:

- a) Memakai pakaian yang suci dan bersih;
- b) Menutup aurat; dan
- c) Tidak memakai pakaian yang diperbuat daripada sutera tulen.

Adab berpakaian bagi wanita semasa menghadiri upacara akad nikah di masjid adalah seperti yang berikut:

- a) Memakai pakaian yang suci dan bersih;
- b) Menutup aurat; dan
- c) Memakai pakaian yang longgar (tidak ketat), tidak jarang atau nipis sehingga boleh menampakkan kulit dan bentuk susuk badan.

Adab Berhias dan Berdandan

Sebagai agama yang mudah dan mengamalkan kesederhanaan, Islam tidak menolak secara mutlak konsep berhias dalam kalangan wanita Islam. Namun begitu, cara berhias dan berdandan seseorang wanita itu mestilah selaras dengan tuntutan Islam, iaitu antaranya seperti yang berikut:

- a) Tidak berlebih-lebihan atau keterlaluan dalam bersolek dan berhias sehingga boleh menarik perhatian orang yang memandang atau membawa kepada fitnah;
- b) Hanya mengenakan solekan yang ringkas bagi menaikkan seri wajah pengantin;
- c) Niat asal bersolek itu bukanlah dibuat dengan tujuan untuk menunjuk-nunjuk atau menarik perhatian orang yang memandang;

- d) Memakai perhiasan dan barang kemas seperti cincin, gelang dan rantai tidak secara melampaui batas sehingga boleh membawa kepada sikap sombong dan bermegah-megah untuk mempamerkan kekayaan; dan
- e) Diharuskan bagi pengantin perempuan dan ahli rombongan wanita memakai bau-bauan bagi tujuan menghilangkan bau badan, tetapi pemakaiannya tidak boleh secara berlebihan sehingga dapat dihidu oleh orang lain atau sehingga menimbulkan fitnah.

Bagi pengantin lelaki dan ahli rombongan lelaki yang mengiringi pengantin, mereka dilarang daripada memakai perhiasan yang berikut:

- a) Rantai, gelang, subang dan perhiasan-perhiasan yang menyerupai wanita; dan
- b) Perhiasan yang diperbuat daripada emas, emas putih dan suasa.

Namun begitu, diharuskan bagi lelaki memakai perhiasan yang berikut:

- a) Cincin yang diperbuat daripada perak dan platinum; dan
- b) Memakai minyak wangi, bahkan, kaum lelaki digalakkan memakai bau-bauan yang harum semasa berkunjung ke masjid.

Harus bagi pengantin perempuan berinai dengan syarat-syarat berikut:

- a) Harus memakai inai pada kedua-dua tangan dan kaki selagi tidak menimbulkan fitnah;
- b) Kadar pemakaian inai di kedua-dua tangan dan kaki adalah terhad sehingga pergelangan tangan dan buku lali sahaja;

- c) Warna yang digunakan tidak bersifat kekal seperti tatu dan tidak mengandungi sebarang unsur yang meragukan;
- d) Corak atau ukiran yang dibenarkan ialah corak atau ukiran daun dan tumbuh-tumbuhan; dan
- e) Corak atau ukiran haiwan, lambang dewa-dewa, ajaran atau apa jua gambaran yang bertentangan dengan syarak adalah dilarang.

Menjaga Tatatertib dan Kesantunan

Selain daripada adab berpakaian dan berhias, pengantin dan ahli rombongan yang hadir juga hendaklah menjaga tatatertib dan kesantunan dalam beberapa aspek berkaitan semasa berada di dalam masjid. Antara perkara-perkara tersebut ialah larangan memasuki masjid bagi:

- a) lelaki dan wanita yang berhadas besar, termasuk bagi wanita yang sedang dalam haid;
- b) kanak-kanak yang dibimbangi najis mereka boleh menitis ke lantai. Bahkan, kanak-kanak yang turut dibawa bersama-sama ke masjid hendaklah dipastikan bersih daripada segala kekotoran dan najis serta bau- bauan yang tidak menyenangkan.

Perkara-perkara berikut juga hendaklah dihindari semasa berada di dalam masjid, iaitu:

- a) Bercakap tentang hal-hal keduniaan, bercerita hal-hal orang lain dan pada perkara yang sia-sia;
- b) Kanak-kanak membuat bising, bermain-main, berlari-lari atau menangis di dalam masjid. Sekiranya tingkah-laku kanak-kanak tersebut sukar lagi dikawal, mereka hendaklah dibawa keluar daripada masjid;

- c) Membawa barang-barang hantaran perkahwinan ke dalam masjid. Memadai dengan hanya membawa mas kahwin semasa upacara akad nikah tersebut dilangsungkan; dan
- d) Sesi bergambar dan rakaman video upacara akad nikah yang melampaui batas sehingga masjid seolah-olah seperti studio rakaman dengan limpahan cahaya kamera.

Berkomunikasi semasa berada di dalam masjid adalah diharuskan dengan adab-adab seperti yang berikut:

- a) Bercakap hanya pada perkara-perkara yang penting, perlu dan bermanfaat sahaja; dan
- b) Bercakap dengan suara yang perlahan supaya tidak mengganggu jemaah lain yang sedang beribadat.

Sekiranya terdapat ahli rombongan pengantin yang bukan beragama Islam turut hadir dalam majlis akad nikah tersebut, diharuskan bagi mereka memasuki masjid dengan syarat-syarat seperti yang berikut:

- a) Mendapat keizinan daripada pihak pengurusan masjid;
- b) Memakai pakaian yang menutup aurat dan sopan;
- c) Perlakuan dan tingkah laku mereka tidak mencemarkan kesucian masjid, sentiasa terkawal dan beradab; dan
- d) Tidak berdo'a atau bertafakur mengikut cara agama mereka dalam keadaan yang boleh menimbulkan fitnah.

Selain itu, antara perkara-perkara yang perlu diberi perhatian oleh pengantin dan ahli rombongan yang hadir ke upacara akad nikah di masjid ialah:

- a) Tempat duduk lelaki dan perempuan mestilah berasingan atau duduk secara bersebelahan antara satu sama lain; dan
- b) Diharuskan makan dan minum di tempat yang telah disediakan khusus oleh pihak pengurusan masjid dengan

memastikan kebersihan masjid sentiasa terjaga daripada sebarang bentuk kekotoran.

Pihak pengurusan masjid juga hendaklah memastikan bahawa upacara akad nikah yang akan dijalankan tidak dilaksanakan di hadapan mimbar atau mihrab masjid.

17. PENUTUP

Berdasarkan kepada fungsi masjid yang turut berperanan sebagai tempat melangsungkan upacara akad nikah, maka sewajarnya masyarakat Islam memanfaatkan masjid dengan sebaik mungkin agar kebersihan dan kesucian masjid serta adab- adab semasa berada di dalamnya sentiasa terpelihara. Dalam masa yang sama, segala aktiviti, perbuatan atau tindakan yang boleh mencemarkan kesucian masjid, menimbulkan kemudaran atau mengganggu ketenangan para jemaah yang hadir hendaklah dielakkan. Perkara ini penting diambil perhatian supaya suasana yang harmoni, tenang dan selesa dapat dikekalkan di masjid dan setiap pengunjungnya dapat melaksanakan ibadat dan mendampingi diri terhadap Allah SWT dengan penuh khusyuk.

18. RUJUKAN

KAMUS

Muhammad Rawwas Qal‘ah Ji, Mu‘jam Lughah al-Fuqaha’, cet. 1. Beirut: Dar al-Nafais, 1996.

Noresah binti Baharom et. al (ed) (2005), Kamus Dewan, Edisi Keempat. Kuala Lumpur: Dewan Bahasa dan Pustaka.

BAHASA ARAB

Saleh bin ‘Abd al-‘Aziz bin Muhammad bin Ibrahim, Mawsu‘ah al-Hadith al-Sharif al-Kutub al-Sittah, cet. 3. Arab Saudi: Dar al-Salam, 2000.

BAHASA MELAYU

Tatatertib di Masjid, cet. 1. Putrajaya: Jabatan Kemajuan Islam Malaysia, 2009.

LAMAN WEB

e-fatwa, Portal Rasmi Fatwa Malaysia, Jabatan Kemajuan Islam Malaysia, <http://www.e-fatwa.gov.my/fatwa-kebangsaan>, 29 November 2011.

**GARIS PANDUAN
BER'IDDAH
BAGI WANITA YANG
BERCERAI ATAU
KEMATIAN SUAMI**

GARIS PANDUAN BER'IDDAH BAGI WANITA YANG BERCERAI ATAU KEMATIAN SUAMI

19. TUJUAN

Garis Panduan Ber'iddah Bagi Wanita Yang Bercerai atau Kematian Suami disediakan sebagai panduan dan rujukan kepada masyarakat Islam di Malaysia khususnya dalam kalangan wanita berkaitan batas hukum dan adab semasa berada dalam tempoh 'iddah menurut tuntutan syarak.

20. PENDAHULUAN

- A. Bagi 'iddah dengan kiraan bulan, pengiraannya adalah berdasarkan kalendar hijrah dan bukannya mengikut kalendar masihi.
- B. Islam sebagai satu cara hidup yang lengkap telah menyusun secara terperinci perkara-perkara yang berkaitan dengan nikah, cerai dan rujuk sebagai satu panduan hukum yang wajib dipatuhi oleh umat Islam. Bagi isu yang melibatkan perceraian, terdapat beberapa aspek yang perlu diberi perhatian seperti nafkah 'iddah, mut'ah, hak penjagaan anak dan pembahagian harta sepencarian. Selain daripada itu, satu lagi perkara penting bagi seorang isteri yang diceraikan ialah tempoh 'iddah yang wajib ditempuh oleh mereka.
- C. Dalam perkara ini, 'iddah turut tidak terkecuali bagi seorang wanita yang kematian suami dan Islam menetapkan bahawa mereka wajib menempuh tempoh 'iddah tertentu dan berkabung atas kematian tersebut.
- D. Dengan berlakunya peredaran masa dan zaman, wanita Islam yang berada dalam tempoh 'iddah sering berhadapan dengan pelbagai persoalan yang memerlukan penjelasan terperinci khususnya dalam hal yang melibatkan batas hukum dan adab bagi seorang wanita ber'iddah atau berkabung. Tambahan

pula, dengan tuntutan kerjaya, kemajuan teknologi maklumat dan komunikasi hari ini, ia turut memberi impak dan cabaran terhadap cara dan gaya hidup masyarakat. Dibimbangi, sekiranya tidak dibimbing dan dipandu dengan sebaiknya, masyarakat Islam khususnya dalam kalangan wanita tidak dapat memahami dan menghayati konsep `iddah dan berkabung yang sebenar seperti yang dituntut oleh Islam, bahkan menganggapnya sebagai perkara remeh dan menyusahkan.

21. TAFSIRAN.

Tafsiran bagi beberapa istilah yang berkaitan dengan garis panduan ini ialah seperti yang berikut:

- | | |
|----------------------------|--|
| <i>Ajnabi</i> - | Tidak mempunyai hubungan kerabat. Orang asing. |
| <i>Berkabung (Ihdad)</i> - | Meninggalkan perhiasan dan seumpamanya bagi wanita yang sedang ber`iddah kerana kematian suami. |
| <i>Fasakh</i> - | Pembubaran perkahwinan dengan kuasa pihak pemerintah. |
| <i>Iddah</i> - | Tempoh tertentu yang ditetapkan ke atas seorang wanita selepas diceraikan atau selepas kematian suami. |
| <i>Istihadhah</i> - | Darah yang mengalir daripada faraj wanita dan ia bukan darah haid atau nifas. |
| <i>Mut`ah</i> - | Pemberian sagu hati oleh suami kepada isteri yang diceraikan. |

- Rujuk* - Suami kembali semula kepada isteri yang diceraikan bukan secara talak ba'in, tanpa memerlukan kepada akad baharu.
- Suami Hilang (Mafqud)* - Terputus hubungan dengan suami dan tidak diketahui sama ada masih hidup atau mati.
- Talak Raj'ie* - Talak yang memberi hak kepada suami untuk kembali rujuk kepada isterinya selagi dalam tempoh 'iddah.
- Talak Ba'in* - Talak yang tidak memberi hak kepada suami untuk kembali rujuk kepada isteri yang diceraikan kecuali dengan mahar dan akad yang baharu. Talak ba'in terbahagi kepada dua iaitu *ba'in baynunah sughra* dan *ba'in baynunah kubra*.
- Ba'in baynunah sughra* - perceraian yang berlaku sebelum berlaku persetubuhan sama ada secara talak satu atau dua.
- Ba'in baynunah kubra* - perceraian secara talak tiga dan suami tidak boleh kembali rujuk kepada isteri yang diceraikan kecuali selepas isteri tersebut berkahwin dengan lelaki lain.

22. HUKUM 'IDDAH DAN BERKABUNG

- a) Hukum 'iddah menurut syarak adalah wajib ke atas wanita yang bercerai atau kematian suami.

- b) Hukum berkabung menurut syarak adalah wajib ke atas wanita yang kematian suami.

23. DALIL-DALIL PENSYARIATAN `IDDAH

Terdapat beberapa dalil daripada al-Quran dan al-Sunnah yang mensyariatkan kewajipan `iddah. Antara dalil-dalil tersebut ialah:

- i. Firman Allah SWT dalam Surah al-Baqarah ayat 228 yang bermaksud:

Dan isteri-isteri yang diceraikan itu hendaklah menunggu dengan menahan diri mereka (dari berkahwin) selama tiga kali suci (dari haid). Dan tidaklah halal bagi mereka menyembunyikan (tidak memberitahu tentang) anak yang dijadikan oleh Allah dalam kandungan rahim mereka, jika betul mereka beriman kepada Allah dan hari akhirat.

Dan suami-suami mereka berhak mengambil kembali (rujuk akan) isteri-isteri itu dalam masa `iddah mereka jika suami-suami bertujuan hendak berdamai. Dan isteri-isteri itu mempunyai hak yang sama seperti kewajipan yang ditanggung oleh mereka (terhadap suami) dengan cara yang sepatutnya (dan tidak dilarang oleh syarak); dan suami mempunyai satu darjat kelebihan atas isterinya. Dan (ingatlah), Allah Maha Kuasa, lagi Maha Bijaksana.

- ii. Dalam Surah al-Talaq ayat 1, Allah SWT berfirman yang bermaksud:

Wahai Nabi! Apabila kamu (engkau dan umatmu) hendak menceraikan isteri-isteri (kamu), maka ceraikanlah mereka pada masa mereka dapat memulakan `iddahnya, dan hitunglah masa `iddah itu (dengan betul), serta bertakwalah kepada

Allah, Tuhan kamu. Janganlah kamu mengeluarkan mereka dari rumah-rumah kediamannya (sehingga selesai `iddahnya), dan janganlah pula (dibenarkan) mereka keluar (dari situ), kecuali (jika) mereka melakukan perbuatan keji yang nyata. Dan itulah aturan-aturan hukum Allah (maka janganlah kamu melanggarnya); dan sesiapa yang melanggar aturan-aturan hukum Allah maka sesungguhnya ia telah berlaku zalim kepada dirinya. (Patuhilah hukum-hukum itu, kerana) engkau tidak mengetahui boleh jadi Allah akan mengadakan sesudah itu sesuatu perkara (yang lain).

- iii. Firman Allah SWT dalam Surah al-Talaq ayat 4 yang bermaksud:

Dan perempuan-perempuan dari kalangan kamu yang putus asa dari kedatangan haid, jika kamu menaruh syak (terhadap tempoh `iddah mereka) maka `iddahnya ialah tiga bulan; dan (demikian) juga `iddah perempuan-perempuan yang tidak berhaid. Dan perempuan-perempuan mengandung, tempoh `iddahnya ialah hingga mereka melahirkan anak yang dikandungnya. Dan (ingatlah) sesiapa yang bertakwa kepada Allah, nescaya Allah memudahkan baginya segala urusannya.

- iv. Hadith Nabi SAW yang diriwayatkan oleh Ibn Majah, daripada Aisyah r.a., katanya yang bermaksud:

Rasululah SAW telah memerintahkan Barirah untuk ber'iddah dengan tiga kali haid.

24. DALIL-DALIL PENSYARIATAN BERKABUNG

Terdapat beberapa dalil daripada hadith Nabi SAW yang mensyariatkan kewajipan berkabung. Antara dalil-dalil tersebut ialah:

- i. Sabda Nabi SAW yang diriwayatkan oleh al-Bukhari bermaksud:

Tidak halal bagi perempuan yang beriman dengan Allah dan hari akhirat berkabung lebih daripada tiga hari, kecuali berkabung kerana kematian suaminya selama empat bulan sepuluh hari.

- ii. Hadith Nabi SAW yang diriwayatkan oleh al-Bukhari, daripada Ummu `Atiyyah r.a., katanya yang bermaksud:

Kami dilarang berkabung atas kematian seseorang melebihi tiga hari kecuali berkabung atas kematian suami selama empat bulan sepuluh hari. Kami dilarang bercelak mata, dilarang memakai wangi-wangian dan memakai pakaian berwarna-warni...

- iii. Sabda Nabi SAW yang diriwayatkan oleh al-Nasa'ie bermaksud:

Tidak halal bagi perempuan yang beriman dengan Allah dan hari akhirat berkabung kerana kematian lebih daripada tiga hari, kecuali berkabung kerana kematian suami, mereka tidak boleh bercelak mata, tidak boleh berinai dan memakai pakaian berwarna- warni.

25. HIKMAH `IDDAH

Terdapat beberapa hikmah pensyariatan `iddah kepada wanita Islam. Antara hikmah tersebut ialah:

- i. Untuk memastikan kekosongan rahim daripada benih suami terdahulu. Ia bertujuan untuk mengelakkan percampuran benih antara suami dahulu dengan suami yang baharu dikahwininya.
- ii. Bagi `iddah talak raj'ie, ia sebagai ruang kepada suami dan isteri untuk berfikir dan menilai semula segala tindakan dan kesilapan yang telah dilakukan termasuk kesan daripada

perceraian yang berlaku. Di samping itu, ia juga dapat memberi peluang kepada suami untuk kembali rujuk kepada isterinya.

- iii. Bagi perempuan yang kematian suami, tempoh `iddah juga sebagai tempoh berkabung bagi menghormati dan mengingati nikmat perkahwinan terdahulu. Ia juga sebagai tanda menjaga hak suami dan tanda menzahirkan kesetiaan isteri kepada suaminya. Selain itu, berkabung juga sebagai lambang pengabdian diri terhadap perintah Allah SWT.

26. JENIS DAN TEMPOH `IDDAH

Secara keseluruhannya, sebab wajib `iddah terbahagi kepada dua bahagian iaitu `iddah disebabkan perceraian semasa hidup dan `iddah dengan sebab kematian suami. Setiap bahagian `iddah tersebut mempunyai pengiraan tersendiri yang akan menentukan tempoh `iddah yang perlu ditempo sama ada panjang atau pendek.

Pengiraan `iddah terbahagi kepada tiga iaitu:

- i. `Iddah dengan kiraan suci (*quru'*);
- ii. `Iddah dengan kiraan bulan; dan
- iii. `Iddah dengan kelahiran atau keguguran kandungan.

Perincian berhubung jenis dan tempoh `iddah adalah seperti dalam Jadual 1.

Jadual 1: Jenis dan Tempoh `Iddah

Bil	JENIS `IDDAH	KEADAAN	TEMPOH `IDDAH	KETERANGAN
1.	Bercerai talak <i>raj`ie/ba`in</i>	Ada haid	3 kali suci	a) Jika ditalaq semasa dalam keadaan suci, `iddahnya tamat apabila datang haid yang ketiga. b) Jika ditalaq semasa dalam keadaan haid, `iddahnya tamat apabila datang haid yang keempat. c) Jika ditalaq semasa dalam keadaan nifas, hendaklah menunggu sehingga tiga kali suci selepas nifas. `Iddah tamat apabila datang haid yang keempat.
2.	Bercerai talak <i>raj`ie/ba`in</i>	Tiada haid (sama ada kerana penyakit, telah dibuang rahim, telah putus haid, belum pernah haid atau lain-lain)	3 bulan	
3.	Bercerai talak <i>raj`ie/ba`in</i>	Sedang mengandung	Sehingga bersalin atau kandungan gugur	Selesai `iddah apabila melahirkan anak sama ada hidup atau mati, atau gugur kandungan yang telah membentuk janin yang sempurna atau hanya berbentuk segumpal daging yang menurut pakar perubatan itulah kandungan yang sebenar.
4.	Bercerai talak <i>raj`ie/ba`in</i> dan belum pernah disetubuhi	Ada haid atau tiada haid	Tiada `iddah	
5.	Bercerai talak <i>raj`ie/ba`in</i> dan menghidap <i>istihadhah</i>	a) Haid tidak menentu tetapi masih dapat mengetahui kebiasaan perjalanan darah haidnya. b) Haid tidak menentu dan tidak mengetahui kebiasaan perjalanan haidnya atau tidak dapat membezakan antara darah haid dan <i>istihadhah</i> .	Tiga kali suci atau tiga bulan	

6.	Berlaku kematian suami semasa berada dalam tempoh `iddah talak <i>raj'ie</i> dan tidak mengandung	Ada haid atau tiada haid	Empat bulan sepuluh hari	Kiraan `iddah baru bermula pada tarikh atau hari kematian suami walaupun sebelum itu `iddah isteri sama ada dengan tiga kali suci atau tiga bulan telah hampir tamat.
7.	Berlaku kematian suami semasa berada dalam tempoh `iddah talak <i>ba'in</i> dan tidak mengandung	Ada haid atau tiada haid	Tiga kali suci atau tiga bulan	Kekal `iddah talak <i>ba'in</i> sama ada dengan kiraan tiga kali suci atau tiga bulan dan `iddah tidak bertukar kepada `iddah kematian suami.
8.	Kematian suami sama ada telah disetubuhi atau belum disetubuhi dan tidak mengandung	Ada haid atau tiada haid	Empat bulan sepuluh hari	Wanita yang kematian suami bukan sahaja wajib ber'iddah, tetapi juga wajib berkabung.
9.	Kematian suami	Sedang mengandung	Sehingga melahirkan anak atau kandungan gugur	Selesai `iddah apabila melahirkan anak sama ada hidup atau mati, atau gugur kandungan yang telah membentuk janin yang sempurna atau hanya berbentuk segumpal daging yang menurut pakar perubatan itulah kandungan yang sebenar.
10.	Suami hilang	Ada haid, tiada haid atau sedang mengandung	Isteri wajib menunggu selama empat tahun. Selepas tempoh tersebut, isteri wajib pula ber'iddah dengan `iddah kematian suami selama empat bulan sepuluh hari.	Bagi kes suami hilang, isteri boleh mengemukakan permohonan kepada Mahkamah Syariah bagi mendapatkan pengesahan kematian suami atau membuat tuntutan fasakh.

27. BATASAN HUKUM SEMASA DALAM TEMPOH `IDDAH TALAK RAJ`IE

Wanita yang sedang menjalani `iddah talak raj`ie mempunyai batas hukum yang perlu dipatuhi sepanjang berada dalam tempoh tersebut. Ini kerana hubungan atau pertalian perkahwinan antara suami isteri yang bercerai secara talak raj`ie masih wujud. Antara perkara-perkara yang perlu dipatuhi ialah:

- i. Haram menerima pinangan lelaki ajnabi.
- ii. Haram berkahwin dengan lelaki ajnabi. Jika perkahwinan dilangsungkan semasa dalam tempoh tersebut, pernikahan itu adalah tidak sah dan pasangan tersebut wajib dipisahkan.
- iii. Tidak dibenarkan keluar rumah kecuali dengan keizinan suami.
- iv. Tidak dibenarkan berpindah atau tinggal di rumah lain yang bukan menjadi kebiasaannya tinggal semasa masih dalam ikatan perkahwinan. Dalam hal ini, suami dilarang menghalau keluar isteri yang diceraikan, bahkan mereka wajib menanggung seluruh nafkahnya termasuk nafkah tempat tinggal. Ini berdasarkan firman Allah SWT dalam Surah al-Talak ayat 1 yang bermaksud:

...Janganlah kamu mengeluarkan mereka dari rumah-rumah kediamannya (sehingga selesai `iddahnya), dan janganlah pula (dibenarkan) mereka keluar (dari situ), kecuali (jika) mereka melakukan perbuatan keji yang nyata...

Namun, mereka dibolehkan keluar dan meninggalkan rumah tersebut sekiranya terdapat bahaya dan kemudaratan yang boleh mengancam keselamatan nyawa dan harta benda.

- v. Tidak boleh berkahwin. Bahkan mereka dituntut untuk bersolek dan berhias kepada suaminya sebagai dorongan bagi membangkitkan keinginannya untuk rujuk semula.

28. BATASAN HUKUM SEMASA DALAM TEMPOR `IDDAH TALAK BA'IN

Bagi wanita yang sedang menjalani `iddah talak ba'in, mereka juga mempunyai batas hukum tertentu sepanjang berada dalam tempoh tersebut. Antara perkara-perkara yang perlu dipatuhi oleh mereka ialah:

- i. Haram menerima pinangan lelaki ajnabi.
- ii. Haram berkahwin dengan lelaki ajnabi. Jika perkahwinan dilangsungkan semasa dalam tempoh tersebut, pernikahan itu adalah tidak sah dan pasangan tersebut wajib dipisahkan.
- iii. Tidak dibenarkan keluar rumah kecuali dalam had dan batas yang diperlukan sahaja. Antara keperluan penting yang membolehkan keluar rumah ialah untuk bekerja, mendapatkan rawatan perubatan dan keperluan-keperluan lain yang penting dan mendesak, dengan syarat mereka dapat menjaga peraturan dan adab-adab seperti yang disyariatkan Islam. Termasuk dalam larangan keluar rumah juga ialah keluar untuk bermusafir walaupun untuk menunaikan ibadat fardu haji. Justeru dalam hal ini, keluar rumah tanpa keperluan yang penting dan mendesak adalah tidak dibenarkan sama sekali.
- iv. Tidak dibenarkan berpindah atau tinggal di rumah lain yang bukan menjadi kebiasaannya tinggal semasa masih dalam ikatan perkahwinan. Ini kerana, sepanjang tempoh `iddah dengan talak ba'in, bekas suami masih berkewajipan menyediakan tempat tinggalnya dan dilarang daripada menghalau keluar isteri yang diceraikan.
- v. Namun, sekiranya terdapat bahaya dan kemudaratan yang boleh mengancam keselamatan nyawa dan harta benda seperti banjir, tanah runtuh, gempa bumi dan sebagainya, mereka dibolehkan keluar dan meninggalkan rumah tersebut

sehinggalah bahaya atau kemudaratan tersebut hilang atau dapat diatasi.

- vi. Disunatkan berkabung dan meninggalkan amalan berhias kerana dibimbangi dengan berhias itu boleh mendorong kepada maksiat dan kerosakan serta membawa kepada fitnah.

29. BATASAN HUKUM SEMASA DALAM TEMPOH `IDDAH KEMATIAN SUAMI

Bagi wanita yang ber`iddah kerana kematian suami, Islam telah menggariskan cara- cara tertentu sepanjang mereka berada dalam tempoh tersebut. Antara perkara-perkara yang mesti dipatuhi oleh mereka ialah:

- i. Haram menerima pinangan lelaki ajnabi.
- ii. Haram berkahwin dengan lelaki ajnabi. Jika perkahwinan dilangsungkan juga semasa dalam tempoh tersebut, pernikahan itu adalah tidak sah dan pasangan tersebut wajib dipisahkan.
- iii. Tidak dibenarkan keluar rumah termasuk untuk bermusafir, kecuali dalam had dan batas yang diperlukan sahaja. Antara keperluan penting yang membolehkan keluar rumah ialah untuk bekerja, mendapatkan rawatan perubatan, membeli barang-barang keperluan asasi (sekiranya tidak ada ahli keluarga atau orang lain yang amanah boleh melakukannya) dan keperluan-keperluan lain yang penting dan mendesak, dengan syarat mereka dapat menjaga peraturan dan adab-adab seperti yang disyariatkan Islam. Keharusan untuk keluar rumah ini juga hanya tertakluk pada waktu siang dan tidak pada waktu malam. Namun, pengecualian diberikan kepada individu yang tidak mempunyai pilihan dan perlu bekerja pada waktu malam seperti doktor, jururawat dan sebagainya. Bagi

larangan bermusafir, ia termasuk larangan untuk menunaikan ibadat fardu haji dan umrah.

- iv. Berpindah atau tinggal di rumah lain yang bukan menjadi kebiasaannya tinggal sepanjang tempoh perkahwinan. Namun, sekiranya terdapat bahaya dan kemudaratannya yang boleh mengancam keselamatan nyawa dan harta benda seperti banjir, tanah runtuh, gempa bumi dan sebagainya, mereka dibolehkan keluar dan meninggalkan rumah tersebut sehinggalah bahaya atau kemudaratannya hilang atau dapat diatasi.
- v. Wajib berkabung sepanjang tempoh `iddah. Oleh itu, sepanjang dalam tempoh tersebut, mereka wajib meninggalkan semua perkara yang mempunyai unsur-unsur berhias sama ada pada pakaian atau tubuh badan. Termasuk dalam larangan berhias ini ialah:
 - (a) Memakai pakaian berwarna terang atau berwarna-warni yang boleh menarik perhatian orang yang memandang;
 - (b) Memakai barang-barang kemas walaupun sebetuk cincin, gelang, rantai dan barang-barang perhiasan lain yang diperbuat daripada emas, perak dan permata;
 - (c) Memakai wangi-wangian pada anggota badan, rambut dan pakaian; dan
 - (d) Bersolek, memakai celak, berinai dan memakai minyak rambut serta perbuatan-perbuatan lain yang dianggap sebagai berhias pada pandangan masyarakat setempat.
- vi. Perintah berkabung ini hanya dikhususkan kepada suruhan meninggalkan hiasan tubuh badan dan pakaian sahaja, tidak termasuk hiasan tempat tinggal, bilik tidur dan sebagainya.
- vii. Justeru, walaupun wanita berkabung dilarang daripada berhias, ini tidak bermakna mereka perlu mengabaikan aspek kebersihan dan kesihatan diri serta ahli keluarga. Malah, mereka wajib menjaga kebersihan dan kekemasan diri, pakaian

dan tempat tinggal sepanjang tempoh `iddah dan berkabung itu.

30. KESIMPULAN

Islam bukan hanya menjaga dan memelihara kebajikan dan hak-hak wanita semasa mereka masih berada dalam tempoh perkahwinan, malah berterusan sehingga terbubarnya perkahwinan tersebut sama ada kerana perceraian hidup mahupun perceraian mati. Sudah pasti terdapat hikmah yang besar disebalik setiap perkara yang disyariatkan oleh Islam yang mungkin tidak mampu dijangkau oleh akal manusia. Begitu juga dengan pensyariatan `iddah dan berkabung oleh Allah SWT ke atas kaum wanita. Justeru, sebagai hamba-Nya yang beriman, kita wajib patuh dan taat serta mengambil berat terhadap tuntutan tersebut tanpa sebarang persoalan atau menghadapinya dengan perasaan dan jiwa yang berkeluh-kesah. Bahkan kepatuhan kepada perintah Allah SWT itu merupakan satu tanda pengabdian diri dan kepatuhan hamba-Nya terhadap Pencipta Yang Maha Agung.

Dalam era wanita Malaysia yang berkerjaya, peranan ahli keluarga dan anggota masyarakat juga tidak kurang pentingnya. Mereka perlu sentiasa dididik dan diberi kesedaran supaya dapat menghayati dan menghormati situasi wanita yang sedang ber`iddah dan berkabung serta membantu mereka agar dapat menjalani tempoh tersebut mengikut landasan syarak. Ini penting kerana dengan pemahaman yang jelas berhubung hal ini, perkara-perkara yang ditegah oleh Islam dapat dihindari seterusnya mengelakkan berlakunya fitnah, tohmahan dan unsur-unsur yang kurang menyenangkan terhadap wanita yang sedang ber`iddah dan berkabung.

31. PENUTUP

Garis panduan ini diharap dapat memberikan panduan kepada masyarakat Islam khususnya dalam kalangan wanita Islam yang sedang menjalani tempoh `iddah dan berkahung supaya dapat melalui detik-detik tersebut dengan lebih mudah dan tenang. Ia juga diharap dapat membantu masyarakat untuk lebih memahami dan menghayati konsep `iddah dan berkahung menurut tuntutan Islam yang sebenar.

32. RUJUKAN

TERJEMAHAN AL-QURAN

Abdullah Basmeih. 2001. *Tafsir Pimpinan Ar-Rahman Kepada Pengertian al-Qur'an*. Cet. 12. Kuala Lumpur: Darul Fikir.

KAMUS

'Muhammad Rawas Qalñah Ji.2006. *Muñjam Lughah al-Fuqaha'*.Cet. 1. Beirut: Dar al-Nafa

BAHASA ARAB

'Abd al-Karim Zaidan. 2000. *Al-Mufasssal fi Ahkam al-Mar'ah wa al-Bait al-Muslim fi al-Shari'ah al-Islamiyyah*. Juz. 9. Beirut: Mu'assasah al-Risalah.

Ibn al-Jauzi, Imam Jalal al-Din Abi al-Farj. 1998. *Ahkam al-Nisa'*. Beirut: Dar al-Ma'rifah.

Saleh bin ÑAbd al-ÑAziz bin Muhammad bin Ibrahim. 2000.*Mawsuñah al-Hadith al-Sharif al-Kutub al-Sittah*. Cet. 3. Arab Saudi: Dar al-Salam.

Wahbah al-Zuhaily. 1997.*Al-Fiqh al-Islami wa Adillatuh*. Juz. 9. Beirut: Dar al-Fikr.

Wazarah al-Awqaf wa al-Syu'un al-Islamiyyah.1993. *Al-Mawsu'ah al-Fiqhiyyah*.Juz. 2. Kuwait: Wazarah al-Awqaf wa al-Syu'un al-Islamiyyah.

Al-Mawsu'ah al-Fiqhiyyah.Juz. 29. Kuwait: Wazarah al-Awqaf wa al-Syu'un al-Islamiyyah.

AKTA

Akta Undang-Undang Keluarga Islam (Wilayah-Wilayah Persekutuan) 1984 (Akta 303). 2005. Petaling Jaya: International Book Services.

**GARIS PANDUAN
BEDAH SIASAT MAYAT
MENURUT
PERSPEKTIF ISLAM**

GARIS PANDUAN BEDAH SIASAT MAYAT MENURUT PERSPEKTIF ISLAM

33. DAFTAR ISTILAH

- a) ***Dharuriyyat*** - Suatu keadaan yang mana tiada cara atau jalan lain untuk menyelesaikan perkara tersebut melainkan terpaksa melakukan perkara tersebut .
- b) ***Hajiyat*** - Keperluan bagi tujuan memudahkan hal-hal daruriyyat.
- c) ***Rukhsah***- (Kemudahan) - Rukhsah bermaksud hukum-hukum yang telah disyariatkan oleh Allah S . W. T. berdasarkan kepada keuzuran seseorang hamba kerana menjaga hajat mereka serta berkekalan sebab yang mewajibkan hukum asal.
- d) ***Etika*** - Etika bermaksud ilmu berkenaan prinsip-prinsip akhlak atau moral yang menjadi pegangan seseorang individu atau sesuatu kumpulan .
- e) ***Interpretasi*** - Tafsiran, penjelasan (tentang makna, tujuan, implikasi) Subklavikular - bawah tulang selangka

34. TUJUAN

Garis panduan ini disediakan untuk dijadikan panduan kepada pengendali bedah siasat, pengamal undang-undang, polis dan mereka yang berkenaan dalam pengendalian bedah siasat mayat.

35. PENGENALAN

Sejarah perubatan telah mencatatkan bahawa bedah siasat atau post mortem ke atas mayat, atau dengan lain perkataan ilmu perubatan forensik mula diperkenalkan dari Negara Arab, kemudian berkembang ke Greek dan negara-negara barat seterusnya ke seluruh dunia. Perkembangan kemajuan sains perubatan dalam ilmu pembedahan adalah berasaskan kepada keilmuan yang dibawa oleh Ibnu Sina.

Perkembangan dari semasa ke semasa melalui kajian dan pengajian ahli sains perubatan telah menghasilkan teknologi moden dalam ilmu bedah siasat mayat dengan cara lebih saintifik bagi mencari keadilan yang dikehendaki.

Pada abad ke 21 ini, bedah siasat mayat merupakan satu perkara yang tidak dapat dielakkan dan bukan asing di kalangan umat Islam. Ini kerana ia adalah tindakan yang perlu diambil dan dilakukan untuk kepentingan masyarakat seperti untuk menyelesaikan kes-kes jenayah atau bukan kes jenayah serta kajian dalam bidang perubatan. Walau bagaimana pun dalam urusan bedah siasat mayat, Islam telah menetapkan beberapa garis panduan yang perlu diikuti supaya tidak timbul percanggahan antara tuntutan syarak dengan amalan yang dilakukan dalam bidang perubatan.

36. KEPUTUSAN FATWA

Muzakarah Jawatankuasa Fatwa Kebangsaan kali ke-25 yang bersidang pada 13 Disember 1989 telah memutuskan;

“Pembedahan mayat orang Islam hanya boleh dilakukan jika keadaan benar-benar memerlukan (dharurat) sahaja seperti terlibat di dalam kes-kes jenayah yang sangat memerlukan post mortem atau si mati tertelan benda yang berharga atau si mati yang sedang mengandung sedangkan kandungannya masih hidup.”

Muzakarah Jawatankuasa Fatwa Kebangsaan kali ke-61 yang bersidang pada 27 Januari 2004 dalam membincangkan mengenai hukum bedah siasat mayat yang kematian bukan dikategorikan kes jenayah telah memutuskan;

“Hukum asal pembedahan mayat adalah haram tetapi dibolehkan sekiranya dalam keadaan dharurat dan terdapat keperluan yang mendesak seperti membuat kajian terhadap penyakit, mengenalpasti

punca kematian dan penyelidikan serta pendidikan khususnya dalam bidang perubatan . ”

37. AMALAN BEDAH SIASAT MAYAT

A. Definisi Bedah Siasat Mayat

Bedah siasat atau dalam istilah bahasa Inggeris disebut post-mortem bermaksud suatu pemeriksaan yang dijalankan oleh Pegawai Perubatan Kerajaan ke atas mayat. Ianya melibatkan pemeriksaan luaran dan dalaman untuk mengenalpasti punca kematian dan ciri atau setakat mana perubahan dihasilkan oleh sesuatu penyakit, kimia, radiasi, kemalangan, kecederaan dan lain-lain.

B. Objektif Bedah Siasat Mayat

Pembedahan yang dilakukan ke atas mayat mempunyai objektif-objektif tertentu di antaranya:

- i. Untuk mengesahkan identiti si mati.
- ii. Untuk mengenalpasti sebab kematian.
- iii. Untuk mengetahui punca, cara dan masa kematian.
- iv. Untuk menghilangkan keraguan mengenai sebab kematian.
- v. Untuk menunjukkan penyakit dan kecacatan.
- vi. Untuk mengesan, menggambar dan mendokumenkan penyakit dan kecederaan luar serta dalam.
- vii. Mendapatkan sampel untuk dikaji seperti kajian kuman, tisu abnormal dan lain-lain.
- viii. Untuk mengambil gambar dan rakaman video bagi tujuan bukti/barang kes.
- ix. Untuk menyediakan laporan bertulis yang lengkap tentang penemuan dalam pemeriksaan mayat.

- x. Untuk memberi perkhidmatan pakar tentang interpretasi penemuan semasa pemeriksaan mayat.
- xi. Untuk memulih semula keadaan mayat yang cedera teruk sebaik mungkin sebelum diserahkan kepada waris.
- xii. Untuk pengajian akademik, menjalankan kajian dan penyelidikan dalam bidang perubatan. Xiii .Untuk meningkatkan kepakaran.
- xiii. Untuk membuat kajian rawatan sesuatu penyakit.
- xiv. Untuk keperluan undang-undang.

C. Jenis-jenis Bedah Siasat Mayat

i. Bedah siasat clinical

Bedah siasat mayat dijalankan bagi mengesahkan punca kematian, kesan sesuatu penyakit atau kecederaan serta bagi tujuan pembelajaran dan penyelidikan. Kes-kes kematian ini tidak berkait dengan kes Polis seperti kes penyakit mudah berjangkit atau kematian di wad. Pegawai Perubatan Kerajaan perlu mendapat keizinan dari waris sebelum membuat bedah siasat. Dalam kes-kes yang melibatkan kepentingan umum seperti kes di bawah Akta Pencegahan dan Kawalan Penyakit Berjangkit 1988 (Akta 342), bedah siasat mayat dibolehkan tanpa perlu merujuk atau mendapat keizinan waris.

ii. Bedah siasat medicolegal

Bedah siasat ke atas mayat yang dikaitkan dengan kes Polis seperti kemalangan, mati lemas, kebakaran, pembunuhan dan kematian yang disyaki/tidak pasti sebabnya. Majistret atau Polis akan mengeluarkan arahan (Borang Pol. 61) kepada Pegawai Perubatan Kerajaan untuk menjalankan

bedah siasat mayat tanpa perlu merujuk atau mendapat keizinan waris.

D. Keperluan Bedah Siasat Mayat

- i. Bedah siasat mayat dilakukan kerana ia keperluan undang-undang untuk membuktikan kebenaran dan menegakkan keadilan bagi si mati dan waris.
- ii. Bedah siasat mayat dapat mengelakkan perkara yang tidak diinginkan yang timbul di masa hadapan setelah mayat dikebumikan.
- iii. Hasil bedah siasat mayat dapat digunakan bagi menyelamatkan dan melindungi orang ramai daripada penyakit berjangkit yang berbahaya pada masa akan datang.
- iv. Bedah siasat mayat dapat menambah ilmu dan kepakaran dalam bidang perubatan.
- v. Kajian daripada hasil bedah siasat mayat dapat meningkatkan tahap kesihatan dan keharmonian hidup masyarakat.

E. Kematian yang perlu bedah siasat

Selain bedah siasat mayat yang dibenarkan mengikut keputusan Muzakarah Jawatankuasa Fatwa Kebangsaan, terdapat juga kematian yang perlu kepada bedah siasat mengikut peruntukan undang-undang dan arahan Kementerian Kesihatan Malaysia yang selaras dengan kehendak syarak (dharuriyyat dan hajjiyat) iaitu:

i. Kes kematian medicolegal

- a) Semua kematian yang mendadak luar biasa, disyaki bukan kes-kes biasa, akibat perlakuan ganas seperti bunuh.

- b) Kematian mendadak biasa tetapi tidak diketahui sebab kematian dari segi perubatan.
- c) Kematian akibat kemalangan menggunakan kenderaan.
- d) Kematian di tempat kerja; kemalangan, penyakit dan keracunan di tempat kerja.
- e) Kematian akibat keracunan. (e.g. alcohol intoxication, coal gas, insecticides, barbiturates etc).
- f) Kematian akibat bunuh diri.
- g) Kematian akibat penggunaan gas-gas perubatan semasa pembedahan, prosedur penyiasatan perubatan, peralatan dan teknologi yang digunakan oleh hospital/klinik dan sebagainya.
- h) Kematian akibat kemalangan di rumah/ hospital/ institusi/ tempat umum.
- i) Kematian akibat kecuaiannya pegawai dan kakitangan hospital/klinik seperti kecuaiannya menggunakan prosedur perubatan, peralatan, ubat, rawatan dan sebagainya.
- j) Kematian tahanan polis, tahanan reman, banduan di kem-kem tahanan.
- k) Kematian di Institusi Mental, rumah sakit jiwa dan lain-lain.
- l) Kematian bayi baru lahir yang dijumpai.
- m) Kematian kanak-kanak akibat kelelahan (suffocation) nafas.
- n) Kematian berkaitan anak-anak angkat.
- o) Sebarang kematian akibat kebakaran dan letupan.
- p) Mati lemas.

- q) Sebarang kematian di luar kawasan kediaman seperti di tepi jalan, dalam sungai, perairan dan sebagainya, di mana kediaman si mati tidak diketahui.
- r) Kematian akibat dari bahan-bahan kimia dan radiasi perindustrian seperti toksid, asid, radioaktif dan sebagainya.

ii. Kes Kematian Clinical

- a) Kematian akibat penyakit berjangkit seperti Sindrom Pernafasan Akut Yang Teruk (SARS), AIDS, Anthraks, Japanese Encephalitis (JE) dan seumpamanya.
- b) Kematian di wad yang diketahui sebabnya tetapi memerlukan maklumat lebih lanjut mengenai sebab kematian.
- c) Kematian ibu semasa mengandung (maternal death).

F. Prosedur Bedah Siasat Mayat

- i. Kebenaran bagi menjalankan bedah siasat mayat tertakluk kepada:
 - (a) Arahan Majistret atau Polis bagi kes-kes kematian medicolegal.
 - (b) Arahan Ketua Pengarah Kesihatan bagi kes-kes tertentu seperti penyakit berjangkit atas kepentingan umum.
 - (c) Mendapatkan kebenaran dan keizinan bertulis dari waris bagi kes-kes bedah siasat clinical.
- ii. Bedah siasat ke atas mayat hanya boleh dijalankan di hospital-hospital Kerajaan atau tempat lain yang sesuai (Seksyen 330 Kanun Acara Jenayah).

- iii. Bedah siasat mayat hanya boleh dijalankan oleh Pegawai Perubatan Kerajaan sahaja.

G. Proses Bedah Siasat Mayat

- i. Pemeriksaan luaran Menjalankan pemeriksaan luaran untuk mendokumentasi kecederaan mayat. Pegawai Perubatan Kerajaan akan membuat pemeriksaan terperinci ke atas mayat antaranya pakaian simati, keadaan mayat secara keseluruhan, perubahan-perubahan luaran yang berkaitan dengan kematian dan penyakit serta tanda-tanda kecederaan. Sekiranya sebab kematian dapat dikenalpasti, maka pembedahan mayat tidak lagi perlu dilaksanakan.
- ii. Pemeriksaan dalaman Sekiranya pemeriksaan luaran masih tidak dapat mengenalpasti punca kematian, maka pemeriksaan dalaman perlu dijalankan. Ini termasuklah membuka tempurung kepala, rongga dada, abdomen, pelvis dan lain-lain bila mana perlu.
- iii. Pengambilan spesimen iaitu mengambil cecair badan untuk analisis toksikologi dan lain-lain ujian seperti pemeriksaan radiologi, kaji kuman, kajian tisu dan fotografi Forensik.

38. ETIKA BEDAH SIASAT MAYAT MENURUT ISLAM

Kaedah melakukan bedah siasat mayat bukanlah sesuatu yang mutlak. Individu atau kumpulan yang terlibat dalam urusan bedah siasat mayat perlu memenuhi etika yang digariskan oleh syarak antaranya;

(a) Menghormati, menjaga hak dan kemuliaan mayat sebagai manusia

Semua Pegawai dan Petugas Perubatan Kerajaan yang terlibat dalam proses bedah siasat hendaklah menghormati mayat seperti manusia yang masih hidup. Islam menyuruh

orang yang masih hidup supaya menjaga kemuliaan, hak-hak dan kehormatan orang yang telah mati sepertimana orang hidup tanpa mengira bangsa, agama dan keturunan. Islam melarang seseorang menganiayai seseorang yang lain sama ada pada diri, maruah dan harta mereka. Firman Allah S.W.T. dalam Surah al-Israa' ayat 70 yang bermaksud:

“Dan sesungguhnya Kami telah memuliakan anak-anak Adam; dan Kami telah beri mereka menggunakan berbagai-bagai kenderaan di darat dan di laut; dan Kami telah memberikan rezeki kepada mereka dari benda-benda yang baik-baik serta Kami telah lebihkan mereka dengan selebih-lebihnya atas banyak makhluk-makhluk yang telah Kami ciptakan.”

(b) Menyegerakan urusan bedah siasat mayat

Urusan bedah siasat mayat hendaklah dijalankan dengan segera supaya selaras mengikut kehendak syarak yang mewajibkan mayat diuruskan dengan segera, sebagaimana hadis yang diriwayatkan dari Abu Hurairah r.a. berkata: Rasulullah s.a.w. bersabda yang bermaksud:

“Segeralah penyelesaian pengurusan jenazah kerana kalau ia jenazah orang soleh maka bererti kamu menyegerakan kepada kebaikan dan apabila sebaliknya (mayat yang tidak soleh) maka bererti kamu telah melepaskan kejahatan dari bahu.” (Riwayat Muslim)

(c) Kebenaran Waris

- i. Bagi kes-kes bedah siasat clinical, Pegawai Perubatan Kerajaan perlu mendapat kebenaran daripada waris untuk melakukan bedah siasat.

- ii. Bagi kes-kes bedah siasat medicolegal kebenaran dari waris tidak diperlukan untuk melakukan bedah sisat.

(d) Melakukan bedah siasat dengan cermat (tidak kasar)

Pembedahan hendaklah dilakukan dengan cara cermat supaya tidak merosakkan kehormatan dan kemuliaan mayat. Hadis Rasulullah s.a.w. yang bermaksud;

Dari Aisyah r.a. Rasulullah S.A.W. bersabda;

“Memecahkan/mematahkan tulang mayat sama seperti memecahkannya /mematahkannya sewaktu hidupnya”.

(Riwayat Abu Daud)

(e) Melakukan bedah siasat mayat setakat yang diperlukan sahaja

Bedah siasat mayat yang dilakukan tidak boleh melampaui batas atau had rukhsah yang dibenarkan kerana mengambil kira hukum asal menyakiti mayat adalah haram. Oleh itu, bedah siasat mayat boleh dilakukan ke atas mana-mana anggota mayat yang diyakini boleh membantu mencapai matlamat pembedahan dan mengenalpasti sebab-sebab kematian. Ini bersesuaian dengan kaedah fiqhiyyah iaitu ‘perkara dharurat adalah dikira mengikut kadarnya’.

(f) Menjaga aurat mayat

Orang yang melakukan bedah siasat mayat hendaklah tidak boleh dengan sengaja melihat aurat mayat kecuali pada kadar yang diperlukan sahaja. Diriwayatkan dari Saidina Ali k.m.j., Rasulullah s.a.w. bersabda yang bermaksud: *“Janganlah kamu nyatakan (perlihatkan) pahamu, dan*

janganlah kamu memandang kepada paha orang hidup dan orang mati”.

(Riwayat Abu Daud dan Ibnu Majah) Mayat seboleholehnya diuruskan oleh petugas dari jantina yang sama. Kaedah ini merujuk kepada keputusan Persidangan Majma‘ al-Fiqh al-Islami (Islamic Fiqh Academic) di Brunei Darussalam pada 21-27 Jun 1993 mengenai wanita yang ingin mendapatkan rawatan perlu mengikut keutamaan berikut;

- i. Doktor perempuan muslim pakar
- ii. Doktor perempuan bukan muslim pakar
- iii. Doktor lelaki muslim pakar
- iv. Doktor lelaki bukan muslim pakar

Islam mengharuskan rawatan lelaki terhadap perempuan dan sebaliknya dengan syarat-syarat seperti berikut;

- i. Tidak bersendirian
- ii. Menahan pandangan mata
- iii. Menyentuh di tempat yang berkaitan
- iv. Menyediakan doktor pakar mengikut jantina

(g) Menjaga rahsia mayat

Pegawai dan Petugas Perubatan Kerajaan yang terlibat dalam bedah siasat mayat hendaklah menyimpan rahsia mayat, iaitu tidak mengaibkan dan tidak mendedahkan keadaan mayat kepada pihak yang tidak berkenaan.

(h) Tidak menghina, mencemuh dan memaki mayat

Pegawai dan Petugas Perubatan kerajaan yang terlibat dalam pengendalian mayat tidak boleh menghina,

mencemuh atau memaki mayat. Hadis Rasulullah s.a.w. yang bermaksud:

“Dari Ibnu Umar telah berkata: Sabda Rasulullah s.a.w.: Sebutlah kebaikan orang yang telah mati dan berhentilah dari menyebut keburukan mereka”. (Riwayat at-Tirmizi)

(i) Mengambil langkah-langkah keselamatan

Pegawai dan Petugas perubatan kerajaan yang menjalankan bedah siasat mayat hendaklah mengambil kira langkah-langkah keselamatan terutamanya dalam pengendalian mayat yang berisiko terutamanya bagi kes penyakit berjangkit.

(j) Menguruskan mayat dan sampel kajian (organ atau tisu) selepas bedah siasat dengan sebaik-baiknya.

- i. Anggota mayat yang dibedah hendaklah dijahit semula dengan kemas.
- ii. Semua organ atau tisu yang diambil untuk kajian hendaklah dikembalikan kepada mayat sebelum mayat disempurna dan dikebumikan.
- iii. Bagi kes yang memerlukan kajian dan penyelidikan ke atas sampel dari mana-mana anggota mayat yang memakan masa lama (disimpan bertahun-tahun dalam makmal) kerana kekurangan pakar, penyakit masih tidak dapat dikenalpasti, kekurangan alat dan sebagainya, maka jenazah hendaklah disempurna dan dikebumikan dahulu. Manakala organ atau tisu yang diambil untuk kajian hendaklah ditanam atau diserahkan kepada waris atau pihak bertanggungjawab.
- iv. Kajian dan siasatan ke atas sampel yang diambil hendaklah dijalankan dengan segera.

(k) Tidak mengambil tisu atau organ mayat

Pegawai dan Petugas Perubatan Kerajaan tidak dibenarkan mengambil mana-mana tisu atau organ daripada mayat yang dibedah siasat melainkan dengan kebenaran undang-undang. (Akta Tisu Manusia 174 - Akta 130).

(l) Orang yang dibenarkan hadir semasa bedah siasat mayat

Hanya petugas bedah siasat mayat dan pihak berkuasa yang berkaitan sahaja dibenarkan berada di dalam bilik bedah siasat semasa bedah siasat dijalankan.

39. PERANAN JABATAN / AGENSI

Jabatan / Agensi yang terlibat dalam urusan bedah siasat mayat hendaklah memastikan garis panduan ini dipatuhi. Agensi tersebut ialah Kementerian Kesihatan Malaysia, Polis Diraja Malaysia, Jabatan Kehakiman, Jabatan Peguam Negara, Jabatan Kimia, Pihak Berkuasa Tempatan dan Jabatan Agama. Bagi memastikan prosedur bedah siasat ini dilaksanakan dengan segera dan menepati kehendak syarak, perkara-perkara berikut perlu diberi perhatian:

- i. Pegawai dan Petugas Perubatan Kerajaan yang terlibat dalam urusan bedah siasat mayat hendaklah memberi perhatian kepada peruntukan Seksyen 330 Kanun Acara Jenayah.
- ii. Pihak Kementerian Kesihatan atau pihak pentadbir hospital mestilah memberi keutamaan dalam urusan bedah siasat mayat supaya urusan pengendalian jenazah tersebut dapat disempurnakan.
- iii. Ketua-ketua Jabatan/Agensi yang terlibat dengan bedah siasat mayat hendaklah mengawasi pelaksanaan garis panduan ini supaya dipatuhi.

40. PENUTUP

Penyediaan garis panduan ini merangkumi semua mayat tanpa mengira bangsa, keturunan dan agama. Mematuhi tuntutan syarak terhadap perkara-perkara yang berbangkit dari bedah siasat adalah suatu amanah yang wajib ditunaikan terutama bedah siasat yang melibatkan mayat orang Islam. Aspek perlaksanaan bedah siasat mayat yang lebih dipengaruhi faktor perundangan melebihi aspek klinikal perlu diberi perhatian serius bukan sahaja oleh pengamal perubatan bahkan oleh penggubal polisi. Garis panduan ini memberi makna dan implikasi yang mendalam dan boleh membantu menyelesaikan banyak masalah dalam isu bedah siasat mayat pada masa ini dan akan datang.



Diterbitkan oleh:
JABATAN MUFTI NEGERI PULAU PINANG
Tingkat 48, KOMTAR, 10000 Georgetown, Pulau Pinang.
Tel : 04-263 2975
Faks : 04-263 2985